



IM LABOR DER MODERNE:  
OVID, METAMORPHOSEN

• TEXTE ZUR VORLESUNG •  
10. JUNI 2021

LABOR

PROF. DR. JÜRGEN PAUL SCHWINDT  
UNIVERSITÄT HEIDELBERG



## I. OV. MET. 1, 89-150

(nach: P. Ovidi Nasonis Metamorphoses recognovit brevique adnotatione critica instruxit R.J. TARRANT, Oxford 2004)

Aurea prima sata est aetas, quae uindice nullo,  
sponte sua, sine lege fidem rectumque colebat. 90  
poena metusque aberant, nec uerba minantia fixo  
aere legebantur, nec supplex turba timebat  
iudicis ora sui, sed erant sine uindice tuti.  
nondum caesa suis, peregrinum ut uiseret orbem,  
montibus in liquidas pinus descenderat undas, 95  
nullaque mortales praeter sua litora norant;  
nondum praecipites cingebant oppida fossae;  
non tuba directi, non aeris cornua flexi,  
non galeae, non ensis erat; sine militis usu  
mollia securae peragebant otia gentes. 100  
ipsa quoque immunis rastroque intacta nec ullis  
saucia uomeribus per se dabat omnia tellus;  
contentique cibus nullo cogente creatis  
arbuteos fetus montanaque fraga legebant  
cornaque et in duris haerentia mora rubetis 105  
et quae deciderant patula Iouis arbore glandes.  
uer erat aeternum, placidique tepentibus auris  
mulcebant Zephyri natos sine semine flores.  
mox etiam fruges tellus inarata ferebat,  
nec renouatus ager grauidis canebat aristis. 110  
flumina iam lactis, iam flumina nectaris ibant,  
flauaque de uiridi stillabant ilice mella.  
Postquam Saturno tenebrosa in Tartara misso  
sub Ioue mundus erat, subiit argentea proles,  
auro deterior, fuluo pretiosior aere. 115  
Iuppiter antiqui contraxit tempora ueris  
perque hiemes aestusque et inaequales autumnos  
et breue uer spatiis exegit quattuor annum.



tum primum siccis aer feruoribus ustus  
canduit et uentis glacies astricta pependit; 120  
tum primum subiere domos (domus antra fuerunt  
et densi frutices et uinctae cortice uirgae);  
semina tum primum longis Cerealia sulcis  
obruta sunt, pressique iugo gemuere iuueni.

Tertia post illam successit aenea proles, 125  
saeuior ingeniis et ad horrida promptior arma,  
non scelerata tamen. de duro est ultima ferro.  
protinus inrupit uenae peioris in aeuum  
omne nefas; fugere pudor uerumque fidesque,  
in quorum subiere locum fraudesque dolique 130  
insidiaeque et uis et amor sceleratus habendi.  
uela dabat uentis (nec adhuc bene nouerat illos)  
nauita, quaeque diu steterant in montibus altis  
fluctibus ignotis exultauere carinae;  
communemque prius ceu lumina solis et auras 135  
cautus humum longo signauit limite mensor.  
nec tantum segetes alimentaue debita diues  
poscebatur humus, sed itum est in uiscera terrae  
quasque recondiderat Stygiisque admouerat umbris  
effodiuntur opes, inritamenta malorum. 140  
iamque nocens ferrum ferroque nocentius aurum  
prodierat; prodit bellum, quod pugnat utroque,  
sanguineaue manu crepitantia concutit arma.  
uiuatur ex raptis. non hospes ab hospite tutus,  
non socer a genero; fratrum quoque gratia rara est. 145  
imminet exitio uir coniugis, illa mariti;  
lurida terribiles miscent aconita nouercae;  
filius ante diem patrios inquirat in annos;  
uicta iacet pietas, et uirgo caede madentes  
ultima caelestum terras Astraera reliquit. 150